

Siunnersuummut nassuiaatit

## **Nalinginnaasumik nassuiaatit**

### **1. Aallaqqaasiut**

Naalackersuisut Inatsisartut Siulittaasoqarfiannut saaffiginnissuteqarlutik siulittaasoqarfimmumut isumaliutigeqqaata ataatsimiinnermi ingerlasumi suliarineqartussamik inatsisissatut siunnersuummik saqqummiussaartoqaqqullugu, taamaaliornikkut - Kalaallit Nunaata naalackersuinikkut innarlitsaaliorneqarnerata illersorneqarnissaa siunertaralugu – ingerlaannartumik atuutilersumik naalackersuinikkut suliaqarnermut inuit namminersortullu aningaasanik tapiissuteqartarnerannut malittarisassat sakkortusineqassallutik, kinaassutsimik isertuussilluni nunanillu allanit tapiissutinik pissarsinissamut nalinginnaasumik inerteqquteqarnikkut.

Inatsisissatut siunnersuutikkut matumuuna – Kalaallit Nunaata nunarsuarmi sumi inissisimanini tunngavigalugu naalackersuinikkut soqutigineqarnera naalagaaffiullu pissaanilissuup iligisap sinniisaasa Kalaallit Nunaannik tigusillutillu nakkutilliilernissaminnik soqutigisaqarnerminnik ersersitsisimanerat eqqarsaatigalugu – taamatut kaammattuuteqarnek naammassineqarpoq.

Inatsisissatut siunnersuutikkut taamatuttaaq naalackersuinikkut suliniaqatigiiffinnut partiinut inunnit inatsisilerinikkullu inuttut isigineqarsinnaasunit tapiissutit annertussusissaat killilerlugit aalajangersaasoqarnissaannik Europarådimit kaammattuut piviusunngortinneqarpoq.

Peqatigitillugu inatsisissatut siunnersuutikkut innarligassaanneginermik peqquserlulluni iluanaarniarneq akiorniarlugu suliniarneq qanoq nukittorsarneqarsinnaanersoq qulaajarniarlugu misissuinnermi Naalackersuisut 2020-mi suliarititaanni kaammattuutit piviusunngortinneqarput, soorlu aamma inatsisissatut siunnersuutikkut tamanna pillugu Inatsisartut aalajangiinerat, 2022-mi upernaakkut ataatsimiinnermi imm. 120-tut suliarineqarlunilu akuersissutigineqartoq, piviusunngortinneqartoq.

Partiit naatsorsuutaasa saqqummiunneqartarneri pillugit Inatsisartut inatsisaata atuuttup siunertaraa soqutigisaqartut aalajangersimasut qanoq annertutigisumik partiip naalackersuinikkut ingerlataqarneranik aningaasalersueqataanersut innuttaasunut (taamalu aamma qinersisartunut) paasisimasaqarnissaasa qularnaarneqarnissaa. Tamanna pillugu ammasuunissaq innuttaasut piviusumik oqartussaaqataanerannut tunngaviusumik piumasaqaataavoq. Inatsisartut inatsisaat nunanit allanit imaluunniit kinaassutsimik isertuussilluni tapiiffigineqarsinnaaneq pillugu aalajangersakkanik imaqanngilaq, soorlu aamma Inatsisartut inatsisaanni naalackersuinikkut suliniaqatigiiffinnut partiinut inunnit

inatsisilerinikkullu inuttut isigineqarsinnaasunit tapiissutit qanoq annertutigisinnaanerinut killiliinernik aalajangersaasoqarsimangitsoq.

Inatsisissatut siunnersuut pingaarnerusutigut inatsisartut inatsisaannik tulliuttunik allanngortitsiviuvuq:

Siunnersuutigineqarpoq nunanit allanit imaluunniit kinaassutsimik isertuussilluni tapiissuteqartunit tapiissutinik pissarsinissaq ajornartoq aalajangersarneqassasoq. Inerteqquteqarnek taamatutaaq partiit najukkani inuusuttunullu immikkoortortaqrarfiinut atuutissaaq. Inerteqqut aammattaaq Folketingimut Inatsisartunulluunniit ilaasortanut taakkulu sinniisussaannut, kiisalu inunnut Folketingimut Inatsisartunulluunniit qinersinissamut aggersumut qinigassanngortittunut atuutissaaq.

Peqatigitillugu siunnersuutigineqarpoq aalajangersarneqassasoq partiit inunnit inatsisilerinikkullu inuttut isigineqarsinnaasunit tapiissutinik katillugit 200.000 kr.-init sinnilinnik imaluunniit tapiissuteqartunit ataasiakkaanit 20.000 kr.-init sinnilinnik pissarsinnaatitaassanngitsut.

Taamatutaaq tapiissutinut partiip inuinnarnit pissarsiaannut tunngatillugu partiit paasissutissiisussaataanerannut malittarisassat atuuttut assigiinngitsutigut sakkortusineqarnissaat siunnersuutigineqarpoq.

Partii inummit inatsisilerinikkulluunniit inuttut isigineqarsinnaasunit tapiissutinik 10.000 kr.-init amerlanerusunik pissarsisimappat, inatsisartut inatsisaanni atuuttumi piumasarineqarpoq partiip ukiumoortumik naatsorsuutaani tamanit takuneqarsinnaasun paasissutissiisutigineqartassasoq kikkut tapiissuteqarsimanersut, aqqi najugaallu nalunaarlugit. Inatsisissatut siunnersuutikkut piumasaqaat tamanna pingasutigut sakkortusineqarpoq:

Siullermik piumasaqaat annertusineqarpoq taamaasilluni tapiissutit pineqartut annertussusiat aamma nalunaarneqartartussanngussalluni.

Aappaattut inatsisilerinikkut inuttut isigineqarsinnaasut, ass. ingerlatseqatigiiffiit soqutigisaqaqatigiiffiillu, eqqarsaatigalugit 10.000 kr.-inut killigititaq atuuttoq atorunnaarsinneqassaaq. Taamaaliornikkut siunertarineqarpoq tapiissuteqartup tapiissuteqarnermi tamanut saqqummiunneqarnissaa pinngitsoortinniarlugu inatsisilerinikkut inuttut isigineqarsinnaasut arlallit tapiissuteqartumit nakkutigineqartut tamarmillu killissarititaasut sinnernagit tapiissuteqartut aqqutigalugit tapiissuteqarsinnaanerata pinngitsoortinniarneqarnissaa.

Tamatuma kingorna partiip ukiumoortumik naatsorsuutai inatsisilerinikkut inuttut isigineqarsinnaasunit tapiissutit tamaasa, tapiissutit annertussusiat apeqqutaatinnagu, pillugit paasissutissanik imaqartartussaassapput.

Inuit tigussaasut eqqarsaatigalugit killissarititaaq 1.000 kr.-inut appartinneqarpoq. Nalinginnaasumik innuttaasut (inuit tigussaasut) taamaalillutik 1.000 kr.-it tikillugit suli partiimut tapiissuteqarsinnaassapput, tapiissutit annertussusii tapiissuteqartorlu pillugit paasissutissat tamanut saqqummiutinngikkaluarlugit.

Pingajuattut inunnit inatsisilerinikkullu inuttut isigineqarsinnaasunit tapiissutinut tunngatillugu paasissutissiisussaataitaneq annertusineqarpoq tapiissutinut partiimut imaluunniit partiip najukkami inuusuttunulluunniit immikkoortortaqaarfiinut tunniunneqaratik partiimut ilaasortanut qinigassanngortittunulluunniit ataatsiakkaanut, taakku naalackersuinikkut sulinerannut, qineqqusaarnerit ilanngullugit, toqqaannartumik tunniunneqartunut aamma atuuttussanngorlugu. Taamaaliornikkut siunertarineqarpoq tapiissuteqartup tapiissuteqarnermi tamanut saqqummiunneqarnissaa pinngitsoortinniarlugu partiimut tapiissuteqarani partii sinnerlugu qinikkanut aalajangersimasunut tapiissuteqartarnissaa.

Kiisalu siunnersuutigineqarpoq inatsisartut inatsisaanni erseqqissarneqassasoq ukiumoortumik naatsorsuutit tamanut saqqummiunneqarnissaat siunertarlugu partiinit Inatsisartut siulittaasoqarfiannut nassiunneqartussat kukkunersiorneqarsimassasut, naalackersuinikkut suliaqarnermut aningaasatigut tapiissuteqartarnerq pillugu inatsisartut inatsisaat malillugu atuutereersutut. Piumasaqaat tamanna ulluinnarni partiit malereerpaat. Erseqqissaasoqarnissaanik siunnersuutip siunertaraa inunnit inatsisilerinikkullu inuttut isigineqarsinnaasunit tapiissutinut tunngatillugu ukiumoortumik naatsorsuutini paasissutissat kukkunersiorneqarsimanissaasa qularnaarneqarnissaa.

## **2. Siunnersuummi immikkoortut pingaarnerit**

### **2.1. Kinaassutsimik isertuussilluni nunanillu allanit tapiissutit**

#### **A) Inatsisiliornerit atuuttut**

Inatsisiliorneri atuuttuni aalajangersagaqanngilaq partiit kinaassutsimik isertuussilluni nunanilluunniit allanit tapiissutinik pissarsisinaanissaannik mattussisunik killiliisunilluunniit.

Naalackersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaat (Inatsisartut inatsisaat nr. 15, 22. november 2011-meersoq) kinaassutsimik isertuussilluni tapiissutinut tunngatillugu taamatullu aamma tapiissuteqartunit kinaassusii partiimit ilisimaneqanngitsunit tapiissutinut tunngatillugu nunanit allanit tapiissuteqarsimasinnaasut aamma ilanngullugit partiip paasissutissiisussaataanera pillugu aalajangersakkanik imaqarpoq.

Kinaassutsimik isertuussilluni tapiissutit eqqarsaatigalugit Inatsisartut inatsisaanni § 1, imm. 2, oqaaseqatigiit aappaanni aalajangersarneqarpoq tapiissuteqartumit ataatsimiit tapiissummik imaluunniit tapiissuteqartunit arlalinnit katillugit 10.000 kr.-init amerlanerusunik pissarsisimappat tapiissuteqartup aqqa najugaalu ukiumoortumik naatsorsuutinit takuneqarsinnaassasut.

Aammattaaq inatsisartut inatsisaanni § 1, imm. 4-mi aalajangersarneqarpoq ukiumoortumik naatsorsuutit ilassutit nassuiaammi (ilaatigut) kinaassutsimik isertuussilluni tapiissutit partiip najukkami inuusuttunulluunniit immikkoortortoqarfiata pissarsiarisimasai pillugit paasissutissaajunnartumik partiimut tunniunneqarsimasunik imaqassasoq.

Najukkami inuusuttunulluunniit immikkoortortoqarfik qaammatisiutit ukiuanni katillugit 40.000 kr.-it sinnerlugit tapiissutinik pissarsisimappat najukkami inuusuttunulluunniit immikkoortortoqarfik inatsisartut inatsisaanni § 4, nr. 3-4 naapertorlugit pisussaaffeqarpoq kinaassutsimik isertuussilluni tunissutaajunnartut tamarmiusut annertussusii kiisalu kinaassutsimik isertuussilluni 10.000 kr. sinnerlugu tapissutit ataasiakkaat partiip nuna tamakkerlugu kattuffianut paasissutissiissutigissallugit.

#### B) Siunnersuuteqartup isumaliutai

Nunat tamalaat akornanni ukiuni kingullerni arlaleriarluta takusarsimavarput pissaanilissuit avataaneersut imaluunniit nunanit allanit sunniiniartartut nunami allami innuttaasut naqisimaneqaratik qinersinerinik sunniiniartarsimasut.

Kalaallit Nunaata nunarsuarmi sumi inissisimanini tunngavigalugu naalackersuinikkut soqutigineqarnera naalagaaffiullu pissaanilissuup iligisap sinniisaasa Kalaallit Nunaannik tigusillutillu nakkutilliilernissaminnik soqutigisaqarnerminnik ersersitsisimanerat eqqarsaatigalugu tamatuma Kalaallit Nunaanni qinersinernik naalackersuinikkullu aalajangiiniartarnernik sunniiniarsinnaanermut Kalaallit Nunaat eqqorumartissinnaavaa.

Kalaallit Nunaanni qinersinermik imaluunniit allatigut naalackersuinermik sulialinnik sunniiniarluni sakkussat atorineqarsinnaasut eqqarsaatigineqarsinnaasut ilagaat partiinut naalackersuinermilluunniit sulialinnut qinigassanngortittunut qinigaareersunulluunniit aningaasanik tapiissuteqartarnejq – ilaatigut qineqqusaarnermut tapiissutit.

Taamatut ulorianartorsiortitsisinnaanerup kingunerisinnaasai aarleritsannarput: Aningaasanik tapiissuteqarnerit nunat tamalaat akornanni uuttuutit malillugit annikittunnguatus isikkoqartut Kalaallit Nunaanni qineqqusaarnermi annertoorujussuususaapput, nunatsinnilu partiit qineqqusaarnermut peqataasinnaanerinik equitserujussuarsinnaallutik.

Tamanna paasinarsarniarlugu oqaatigineqarsinnaavoq Kunngitsuuniat (Republican Party) Demokraatillu (Democratic Party) USA-mi præsidentimut qinersinermi kingullermi ataatsimut inunnit inatsisilerinikkullu inuttut isigineqarsinnaasunit 2,6 milliard dollarsinit

amerlanerusut katersorsisimammattigit, aningaasaatilissuarlu Elon Musk 2024-mi piffissami juulimiit septembarimuinnaq Trumpip qineqqusaarneranut 72 million dollarsinik (500 mio kr.-it missaannik) tapiissuteqarsimammat.

Qinersinernik naalackersuinikkullu aalajangiiniartarnernik sunniiniarsinnaanerit eqqarsaatigalugit Kalaallit Nunaata eqqoruminassusiata malittarisassanik partiit naalackersuinermillu suliallit ataasiakkaat nunanit allanit tapiissuteqartartunit tapiissutinik pissarsisinnaanerat mattullu malittarisassanik eqqussisoqarnissaa oqariartuutigaa.

Kalaallit Nunaata nunarsuarmi sumi inissisimanini tunngavigalugu ullutsinni naalackersuinikkut soqutigineqarnera Inatsisartunullu qanittukkut qinersisoqartussaanaera eqqarsaatigalugit taamatut malittarisassiornissaa pisariaqavissutut nalilerneqarpoq.

Kalaallit Nunaanni naalackersuinikkut sulinermut nunanit allanit tapiissuteqarfigineqarnissamik inerteqquteqarnek siunertarineqartutut sunniuteqassappat taamatutaaq partiit naalackersuinermillu suliallit ataasiakkaat kinaassutsimik isertuussilluni tapiissutinik pissarsisarsinnaanerisa mattunneqarnerunissaa pisariaqassaaq.

Kinaassutsimik isertuussilluni tapiissutinik inerteqquteqalernikkut peqatigitillugu ”Innarligassaanninneq pillugu misissuineq - Kalaallit Nunaat” peqquserlulluni iluanaarniartarnek (matumani nammineq iluanaarnissaaq piinnarlugu pissaanermik atonerluinertut paasillugu) akiorniarlugu suliniarnerup qanoq nukittorsarneqarsinnaanera qulaajarniarlugu Naalackersuisut 2020-mi suliarititaani kaammattuutit ilaat naammassineqassaaq

### C) Siunnersuut

Nunanit allanit kinaassutsimillu isertuussilluni tapiissuteqartunit tapiissutinik partii pissarsisinnaatitaanninnerisa aalajangersarneqarnissaa siunnersuutigineqarpoq. Inerteqquteqarnek taamatutaaq partiit najukkani inuusuttunullu immikkoortortaqarfiinut atuuppoq. Inerteqquteqarnek taamatutaaq ukununga atuuppoq:

- 1) Folketingimut Inatsisartunulluunniit ilaasortanut taakkulu sinniisussaannut, aamma
- 2) inunntut Folketingimut Inatsisartunulluunniit qinersinissamut aggersumut qinigassanngortittunut.

Partiip nunanit allanit kinaassutsimillu isertuussilluni tapiissuteqartunit tapiissutinik pissarsisup tapiissutit tiguneqarneriniit sapaatit akunneri sisamat qaangiutsinnagut utertittartussanngussavaat. Paasinarsippat partiip tapiissutit utertissinnaanngikkai tapiissutit nunatta karsianut nakkartinneqassapput taamaalillunilu partiip pisussaaffigissallugu tapiissutit tiguneqarneriniit sapaatit akunneri arfineq-pingasut qaangiutsinnagit tapiissutit kontumut aningaasaqarnermut naalackersuisoqarfimmit innersuussutigineqartumut nuussallugit.

Pisussaaffiit taakku taamatuttaaq najukkani inuusuttunullu immikkoortorta qarfinnut nunanit allanit kinaassutsimilluunniit isertuussilluni tapiissutinik pissarsisunut atuupput. Taamaqataannik tamanna atuutissaaq Folketingimut Inatsisartunulluunniit ilaasortanut taakkulu sinniisussaannut, kiisalu inunnut Folketingimut Inatsisartunulluunniit qinersinissamut aggersumut qinigassanngortittunut.

## 2.2. Tapiissutinut killigititat

### A) Inatsisiliornerit atuuttut

Partiit naatsorsuutaasa saqqummiunneqartarneri pillugit Inatsisartut inatsisaata atuuttup siunertaraa soqutigisaqartut aalajangersimasut qanoq annertutigisumik partiip naalackersuinikkut ingerlataqarneranut aningaasalersueqataanerannik innuttaasut (taamalu aamma qinersisartunut) paasisimasaqarnissaasa qularnaarneqarnissaa.

Tunissuteqartunit ataasiakkaanit qanoq annertutigisumik partii inuinnarnit tapiiffigineqarsinnaassanersut imaluunniit partiimut ataatsimut inuinnarnit tapisisutit qanoq annertutigisinnaanesut inatsisiliorneri atuuttuni aalajangersarneqarsimanngilaq.

### B) Siunnersuuteqartup isumaliutai

Inuinnarnit tapiissutit massakkumut Kalaallit Nunaanni partiit aningaasaqarniarnerisa ilagisimavaat suunngitsut. Inuinnarnit tapiissutit ikillutillu annikissimapput. Partiit sulinerat taamaalilluni tamarluinnangajammi pisortanit tapiissutit aqutugalugit pisarpoq.

Partiit Inatsisartunut ilaasortaataqartut naalackersuinikkut suliaqarnermut aningaasatigut tapiissuteqartarnek pillugu Inatsisartut inatsisaat naapertorlugu Namminersorlutik Oqartussanit pisortanit tapiissutinik pissarsisarput – tunngaviusumik tapiissutinik ukiumut 977.500 kr.-iusunik kiisalu qassinik ilaasortaataqarneq tunngavigalugu tapiissutinik (2025-imi) ilaasortaatitamut ataatsimut 316.000 kr.-iusunik.

Taakkununga ilanngunneqassapput qineqqusaarnernut tapiissutit, annertussusii aningaasanut inatsimmi aalajangersarneqartartut. Ukioq manna (2025) Inatsisartunut qineqqusaarnissamut partiit 100.000 kr.-inik tunngaviusumik tapiissutisissapput, tamatumalu saniatigut Inatsisartunut qinersinermi kingullermi taasisimut ataatsimut 100 kr.-inik tapiissutisissallutik. Kommuninut qineqqusaarnermut partiit 50.000 kr.-inik tunngaviusumik tapiissutisissapput kommuninullu qinersinermi kingullermi taasisimut ataatsimut 50 kr.-inik tapiissutisissallutik.

Partiit folketingimut qinersinermut peqataasut tamatuma saniatigut naalackersuinikkut suliniaqatigiiffinnut aningaasaqatigut tapiissutit pillugit inatsit malillugu tapiissutisisarput.

Inunnit inatsisilerinikkullu inuttut isigineqarsinnaasunit tapiissutinik qanoq annertutigisunik partiip pissarsisinnaanerannik killiliisunik inatsisiliorneri atuuttuni aalajangersagaqannginneratali soqutigisaqartut ass. aatsitassarsiornerup aalisarnerulluunniip

iluani, aningaasaateqarluartut periarfissippai partiimut tapiissuteqarsinnaanissamut naalakkersuinikkut suliaqarnermut, qineqqusaarnerit ilanngullugit, pisortat tapiissutaannut sanilliullugit annertuallaarujussuartunik.

Inunnit inatsisitigullu inuttut isigineqarsinnaasunit partiinut tapissutit annertuallaat naalakkersuinikkut aalajangiiniartarnerit ingerlasarnerinut innuttaasut tatiginninnerannik annikillisisinnaavoq. Peqatigitillugu tapiissutit ataasiakkaat qaqutigoorluinnartumik annertussusillit – ass. mio. kr.-inik arlalinnik tapiissuteqarnek – Kalaallit Nunaanni partiit ass. qineqqusaarnermut peqataanissaminnut periarfissaannik equfitsilluinnarsinnaavoq.

Partiinut inuit inatsisilerinikkullu inuttut isigineqarsinnaasut tapiissutaasa annertussusiisa killilerneqarnissaannik malittarisassiortoqarnissaa isumaliutigeqqullugu nunanut ilaasortaasunut Europarådi kaammattuuteqarsimavoq (Recommendation Rec (2023) 4 of the Committee of Ministers to member states on common rules against corruption in the funding of political parties and electoral campaigns, Artikel 3 b, ii).

Taamatut isumaliuteqarnek Kalaallit Nunaat eqqarsaatigalugu qulaani immikkoortuni 2.1-mi oqaatigineqartut naapertorlugit nunanit allanit sunniiniartoqarsinnaaneranit soqutiginarsisinnearpoq. Inatsisissatut siunnersuummi § 1, nr. 2-kkut (§ 4 b nutaaq) taamatut pisoqarsinnaanera illuatungilerniarneqarpoq nunanit allanit kinaassutsimillu isertuussilluni tapiissutinik pissarsisinnaanermik inerteqquteqarnikkut. Mattunneqarsinnaanngilarli nunanit allani suuniartartut inerteqqut tamanna sanioqqunniarsinnaagaat inatsisilerinikkut inuttut isigineqarsinnaasut Kalaallit Nunaanni angerlarsimaffillit siunertamut pilersinneqartut aqqutigalugit tapiissuteqartarnikkut.

### C) Siunnersuut

Siunnersuutigineqarpoq aalajangersarneqassasoq partiit inuinnarnit tapiissutinik katillugit 200.000 kr.-init amerlanerusunik imaluunniit tapiissuteqartunit ataasiakkaanit 20.000 kr.-init amerlanerusunik pissarsisinnaatitaassanngitsut.

Partiip 20.000 kr.-init amerlanerusunik tapiissutinik pissarsisup, tapiissutit ilaat amerlanaarutit utertissavat, tiguneqarneriniit sapaatit akunneri sisamat qaangiutsinnagit. Paasinarsippat tapiissutit ilaat amerlanaarutit partiip utertissinnaanngikkai, tapiissutit ilaat amerlanaarutit nunatta karsianut nakkartitassanngussapput, taamaalilluni partiip pisussaaffigissallugu tapiissutit tiguneqarnerinit sapaatit akunneri arfineq-pingasut qaangiutsinnagit tapiissutit ilaasa amerlanaarutit kontumut aningaasaqarnermut naalakkersuisoqarfimmit innersuussutigineqartumut nuussallugit.

Tamanna aamma atuuppoq partii tapiissutinik pissarsinermigut 200.000 kr.-inut killissarititaq inunnit inatsisilerinikkullu inuttut isigineqarsinnaasunit tapiissutit qaammatisiutit ukiuata ingerlanerani partiip pissarsiarisaanut atuuttoq qaangerpagu.

### 2.3. Tapiissuteqartut kinaassusiinut tapiissuteqartullu ataasiakkaat tapiissutaasa annertussusiinut tunngatillugu paasissutissiisussaataaneq

#### A) Inatsisiliornerit atuuttut

Naalackersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaanni atuuttumi (Inatsisartut inatsisaat nr. 15, 22. november 2011-meersoq) § 1-imi piumasaqaatit aalajangersarneqarpoq partiit Kalaallit Nunaanni Folketingimut Inatsisartunulluunniit qinersinermi kingullermi qinigassannqortitaqarsimasut ukiunut tamanut partiip nuna tamakkerlugu kattuffiata isertitaanut aningaasartuutaanullu ukiumoortumik naatsorsuusiortassasut.

Ukiumoortumik naatsorsuutit § 1, imm. 2, oqaaseqatigiit aappaat naapertorlugu tapiissuteqartut aqqi najugaallu pillugit paasissutissanik imaqaassapput partii ukiumi naatsorsuuteqarfiusumi tapiissuteqartumit ataatsimit ataasiarluni arlaleriarluniluunniit katillugit 10.000 kr.-it sinnerlugu tapiissutinik pissarsisimappat.

Aammattaq inatsisaanni § 1, imm. 4-mi aalajangersarneqarsimavoq ukiumoortumik naatsorsuutit ilassutitut allakkiamik paasissutissanik partiip najukkami inuusuttunulluunniit immikkoortortoqarfiata tapiissutinut najukkami inuusuttunulluunniit immikkoortortoqarfiup pissarsiarisimaasaanut tunngatillugu partiimut tunniussimasai pillugit paasissutissaajunnartunik imaqartumik ilaqartinneqassasut.

Najukkami inuusuttunulluunniit immikkoortortoqarfik qaammatisiutit ukiuanni katillugit tapiissutinik 40.000 kr.-it sinnerlugit pissarsisimappat inatsisartut inatsisaanni § 4, imm. 2 naapertorlugu najukkami inuusuttunulluunniit immikkoortortoqarfik pisussaavoq partiip nuna tamakkerlugu kattuffianut tapiissutit ataasiakkaat annertussusii tapiissuteqartup aqqa najugaalu ilanngullugit partiip nuna tamakkerlugu kattuffianut paasissutissiisutigissallugit, immikkoortortoqarfik tapiissuteqartumit ataatsimit ataasiarluni arlaleriarluniluunniit katillugit 10.000 kr.-it sinnerlugu tapiissutinik pissarsisimappat.

#### B) Siunnersuuteqartup isumaliutai

Peqquserlulluni iluanaarniartarneq (matumani nammineq iluanaarnissaq piinnarlugu pissaanermik atornerluinertut paasillugu) akiorniarlugu suliniarneq qanoq nukittorsarneqarsinnaanersoq Naalackersuisut 2020-mi nalilertippaat. Nalilersuineq Nordic Consulting Groupimit suliarineqartoq, saqqummersinneqartorlu ”Innarligassaanningineq pillugu misissuineq - Kalaallit Nunaat” qulequtaralugu, kaammattuutinik assigiinngitsunik imaqarpoq, tassunga ilanngullugu partiit naatsorsuutaasa tamanut saqqummiunneqartarnerat pillugu inatsisiornerit tunngatillugu kaammattuutinik. Kaammattuutit taakku ilagivaat tapiissuteqartut partiimut 10.000 kr. sinnerlugu tapiissuteqartut aqqi kisimiinnaangitsoq kisiannili aamma tapiissutit annertussusii tamanut saqqummiunneqartariaqartut. Taamatuttaaq kaammattuutigineqarpoq tapiissutigineqarsinnaasunut killiussaqaq saneqqutaarnilugu tapiissutit inatsisilerinikkut inuttut isigineqarsinnaasut akornanni agguataarneqarsinnaassanngitsut.

2022-mi upernaakkut ataatsimiinnermi aalajangiiffigisassatut siunnersuut (UPA2022/120) tulliuuttumik oqaasertalik Inatsisartut akuersissutigaa:

*”Inatsisartut aalajangiiffigisassaattut siunnersuut, Inatsisartut Siulittaasoqarfiat peqquneqassasoq siunnersuummik saqqummiussissasoq, Naalackersuinikkut partiit ingerlatsisut naatsorsuutaasa tamanut saqqummiunneqartarnerat pillugit Inatsisartut Inatsisaat allannngortinneqarnissaannik taamaasilluni partiimut 10.000 kr. sinnerlugu aningaasaliissuteqarsimanermi partiip naatsorsuutaanni kina aningaasaliissuteqarsimanersoq taamaallaat allaqqanani, kisiannili aamma aningaasaliissutit qanoq annertutigineri aamma allaqqasalerluni. Aningaasaliissutigineqarsinnaasullu killissarititaa avaqqunneqarsinnaassanngilattaaq inatsisitigut pisussaataasunit arlaliusunit avinneqarsimalluni.”*

Aalajangiiffigisassatut siunnersuut innarligassaannigineq pillugu misissuinermit kaammattuutit tunngavigalugit saqqummiunneqarpoq. Siunnersuuteqartup tunngavilersuummini ilaatigut oqaatigaa:

*”Inatsit qularnaarinnittuuvoq inuiaqatigiit nalussanngikkaat kikkut naalackersuinikkut partiisut ingerlanneqarneranut aningaasaliissuteqartarnerisut ilisimassagaat. Partiimmi pisortat aningaasaliissutaat kisimi aallavigisariaqanngilaat. Suliffeqarfiit, soqutigisaqaqatigiiffiit aammalumi inuinnaat aningaasaliissuteqarnissaminnut aamma periarfissaqarput.*

*Tamanna pingaartitamikkut anguniagaqarnikkullumi peqquteqarlutik iliuuserisinnaavaat. Kisiannili aamma Naalackersuinikkut partiinut aningaasaliissuteqarneq nammineq iluaqusersornissaq pillugu misiliutigineqarsinnaavoq. Tamanna pingitsoortissinnaanngilarput – kisiannili partiit aningaasalersorneqarnerisa suminngaanneerneranik ammasuunissaa qulakkeersinnaavarput. Taamaasilluta innuttaasut (minnerunngitsumik qinersisartut!) periarfississavagut nalilersuisinnaanngorlugit aningaasaliissuteqarsimasut soqutigisaat aallaavigalugit politikertik politikikkullu inissittarnertik soqutigisaqartunut sammisunngorlugu inissittarnersut.*

*Inatsit oqarpoq partiit ukiumut naatsorsuutaat tamanut saqqummiunneqartassasut, partiilu aningaasaliissutitigut arlaliusunilluunniit tamakkiisumik 10.000kr. annerusumik tigusaqarsimasut naatsorsuutimini aningaasaliisup aqqa najugaqarfialu nalunaarsussallugit pisussaataasut.*

*Tassanilu peqquserluttarnermut nalunaarusiap marluk ima sanngiippallaartut nalilerpai:*

*Sanngiiffik siulleq tassaavoq tapiissutigineqartoq annertussusaa partiip ukiumut naatsorsuutaanni allaqqasariaqanngimmat. Soorlu aatsitassarsiortup imaluunniit imaatigut*

*angallassisartunit partii 18 mio. kr.-inik tapiissuteqarsimappat partiip ukiumut naatsorsuutaanni eqqaaneqartup 10.000 kr.-miit annertunerusumik tapiissuteqarsimanera kisimi nalunaarsorneqassaaq.*

*Saanngiiffik aappaa tassaavoq inatsisitigut pisussaaitaasunit arlalinnit tapiissutigineqartoq avinneqarsimalluni aningaasatigut killissarititaasoq avaqqunneqarsinnaammat. Raajanik aalisariutilik imaluunniit sanaartornermut tunngasunik sulialit partiimut 100.000 kr.-inik tapiiserusuttoq tamanit saqqummiuttussaannigsumik, taava pineqartoq suliffeqarfinnik quliusunik pilersitsisinnaavoq, tamarmillu 10.000 kr.-nik partiimut tuniussaqaartillugit.*

*Inatsit atuuttoq 2011-minngaanneerpoq, danskillu partiit ukiumut naatsorsuusiortarnerisa maleruagassaat assigalugit, Kalaallit Nunaannulli tulluarsagaallutik. Qallunaat Nunaanni maleruagassat taakku sukaterneqarsimapput tamanna Europami Isumalioqatigiissitami innersuussutigineqarnerasigut - Innersuussutigineqartut Peqquserluttarneq pillugu misissuisimanermi aamma innersuussutigineqartoq.*

*Isumaqaarpunga aamma piffissanngortoq inatsit nutartissallugu sanngiiffittut taakkartorneqartut iluarsiumallugit.*

*Inuinaat tapiissuteqartartut partiip isertitarisartagaanni annertunngillat, politikikkullu sunniuteqarniarluni tapiissuteqarniartarneq suli ilisimannngilarput. Kisiannili piffissaq qanoq takutikkumaarpaa? Nunat avannarlermi aningaasatigut soqutigisat annertuut ukiuni makkunani ingerlaleruttoq, peqquserlunniarnernullu assingusunulluunniit akiuniarnissamut pisariaqartitsineq annikilliartunngilaq.”*

*Aalajangiiffigisassatut siunnersuummut tunngavilersuutini siunnersuuteqartup erseqqissarpaa siunnersuut assigiinngitsutigut timalernejarsinnaasoq, periarfissallu ilaat isumaliutigineqarsinnaasoq tassaasoq inatsisilerinikkut inuttut isigineqarsinnaasut, ass. ingerlatseqatigiiffiit suliniaqatigiiffiillu, eqqarsaatigalugit tapiissutit annertussutigisinnaasaannut killigitap peerneqarnera, taamaalilluni partiit naatsorsuutaat inatsisilerinikkut inuttut isigineqarsinnaasut tapissuteqartillugit tamatigut tapiissuteqartut tapiissutillu annertussusii pillugit paasissutissanik imaqaartassallutik.*

*Aalajangiiffigisassatut siunnersuummut isumaliutissiisummi tamatumunnga atatillugu Inatsisinut Ataatsimiititaliap oqaatigaa:*

*[...] ”Inatsisitigut pisinnaatitaallutik arlaliusunit tapiissutit inummit ataatsimit pigineqarnersut/aqunneqarnersut nakkutigissallugu unammillernassasoq oqaatigissallugu ataatsimiititaliap tunngavissaqarsora. Inatsisitigut pisinnaatitaasut, assersuutigalugu ingerlatseqatigiiffiit kattuffiillu, tapiisimatillugit tapiissuteqartut aningaasallu amerlassusaat pillugit paasissutissat pinerit tamaasa partiit naatsorsuutaanni ilanngunneqartarnissaannik piumasqaammik atuutsitsisoqalerpat, tamanna tapiissutit ammasuunissaannik*

*siunnersuummi anguniakkap allaffissornerup annertusineranik nassataqanngikkaluartumik piviusunngortinneranik nassataqassaaq.*

*Inunnut suliffeqarfinnut attuumassuteqaratik tunniussisunut tunngatillugu, nammineq inuuneqarnerannik politikikkullu isumaqarnerannik illersuinissaq eqqarsaatigalugu, annertuallaanngitsunik tunniussaqartut aqqi ilanngullugit tamanut saqqummiunneqartassanngitsut ataatsimiititaliap erseqqissarusuppaa.”*

#### C) Siunnersuut

Siunnersuummi § 1, nr. 5-ikkut partiit naatsorsuutaanni kina tapiissuteqarsimanersoq takuneqarsinnaaginnarani tapiissutit qanoq annertutigisut pineqarnerisut aamma takuneqarsinnaanissaannik Inatsisartut aalajangererat piviusunngortinneqarpoq.

Siunnersuummi § 1, nr. 5-6-ikkut aningaasanut tapiissutigineqarsinnaasunut killiliussap inatsisilerinikkut inuttut isigineqarsinnaasut arlallit akornanni agguataarneqarnerisigut saneqqunneqarsinnaannginnissaannik Inatsisartut aalajangererat piviusunngortinneqarpoq. Inatsisunut Ataatsimiititaliap kaammattuutai naapertorlugit Inatsisartut aalajangererat piviusunngortinneqarpoq partiit naatsorsuutaasa inatsisilerinikkut inuttut isigineqarsinnaasut tapiissutit annertussusiat apeqqutaatinnagu tapiissuteqartoq tapiissutillu annertussusii pillugit paasissutissanik imaqaarnissaannik piumasqaateqalernikkut. Inatsisilerinikkut inuttut isigineqarsinnaasut eqqarsaatigalugit taamaalilluni 10.000 kr-inut killigititaq atuuttoq atuukkunnaarsinneqarpoq.

Inuit tigussaasut eqqarsaatigalugit killiliussaq 1.000 kr.-inut appartinneqarpoq.

Innuttaasunit (inunnit tigussaasunit) 1.000 kr. tikillugit tapiissutit eqqarsaatigalugit taamaalilluni partii tapiissuteqartut aqqi najugaallu aamma tapiissutit annertussusii pillugit tamanit takuneqarsinnaasunik paasissutissiisussaannngillat.

Inatsisunut ataatsimiititaliap oqaatigisai naapertorlugit taamaalilluni tapiissutit annertugisassaannngitsut eqqarsaatigalugit namminiulluni inuunerup naalackersuinikkullu isummat illersorneqarnissaat isiginiarneqarnissaat suli naammassineqarsimassaaq.

2.4. Folketingimut Inatsisartunulluunniit ilaasortanut taakkunungalu sinniisussanut inunnullu Folketingimut Inatsisartunulluunniit qinersinissamut aggersumut qinigassanngortittunut tapiissutit pillugit paasissutissiisussaataaneq.

#### A) Inatsisiliornerit atuuttut

Naalackersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaanni atuuttumi (Inatsisartut inatsisaat nr. 15, 22. november 2011-meersoq) § 1, imm. 4-mi aalajangersarneqarpoq ukiumoortumik naatsorsuutit ilassutitut nassuiaammi paasissutissaajunnartunik imaqaassasut tapiissutit najukkami inuusuttunulluunniit

immikkoortortoqarfiata tigumasai pillugit partiip najukkami inuusuttunulluunniit immikkoortortoqarfiata partiimut nalunaarutigisimasai pillugit.

Najukkami inuusuttunulluunniit immikkoortortoqarfik qaammatisiutit ukiuanni katillugit 40.000 kr.-it sinnerlugit tapiissutinik pissarsisimappat najukkami inuusuttunulluunniit immikkoortortoqarfik inatsisartut inatsisaanni § 4, nr. 2 naapertorlugu pisussaaffeqarpoq tapiissutit ataasiakkaat annertussusii pillugit partiip nuna tamakkerlugu kattuffianut paasissutissiisalluni, immikkoortortoqarfik tapiissuteqartumit ataatsimit tapiissummik tapiissutinilluunniit arlalinnik katillugit 10.000 kr.-init amerlanerusunik pissarsiaqarsimappat, tapiissuteqartup aqqa najugaalu ilanngullugit.

Inatsisartut inatsisaat atuuttoq partiimut ilaasortanut ataasiakkaanut imaluunniit qinigassanngortittut naalackersuinikkut sulinerannut, qineqqusaarnermut tapiissutit ilanngullugit, tapiissutit eqqarsaatigalugit taamaaqataanik aalajangersakkanik imaqaangilaq.

#### B) Siunnersuuteqartup isumaliutai

Inatsisartut inatsisaata atuuttup partiimut ilaasortanut ataasiakkaanut imaluunniit qinigassanngortittut naalackersuinikkut sulinerannut, qineqqusaarnermut tapiissutit ilanngullugit, tapiissutit eqqarsaatigalugit taamaaqataanik aalajangersakkanik imaqaanginnera inunnit inatsisilerinikkulluunniit inuttut isigineqarsinnaasunit partiit pissarsisarnerat pillugu innuttaasut paasisaqarsinnaanissaat qularnaarniarlugu malittarisassat sanioqqutaarneqarsinnaanerannik malitseqarpoq.

Ass. ingerlatseqatigiiffik soqutigisaqaqatigiiffilluunniit partiip qineqqusaarneranut annertuumik tapiissuteqarnissaminik kissaateqarpat, ingerlatseqatigiiffiup imaluunniit soqutigisaqaqatigiiffiup pineqartup tamatuma tamanut saqqummiunneqarnissaa pinngitsoortissinnaavaa partiimut (imaluunniit partiip najukkami inuusuttunulluunniit immikkoortortoqarfianut) tapiissuteqarani inummumut inunnulluunniit partii pineqartoq sinnerlugu qinigassanngortittunut tapiissuteqarnikkut.

Peqquserlulluni iluanaarniartarnernut (nammineq iluanaarnissaq piinnarlugu pissaanermik atornerluineq) inatsisartut inatsisaata illersuutaanenissaanut tamanna sanngeequtaavoq.

#### C) Siunnersuut

Siunnersuummi § 1, nr. 10-kkut (§ 4 a nutaaq) partiimut ilaasortat ataasiakkaat ilaasortat pineqartup naalackersuinikkut suliniarneranut ass. qineqqusaarnissamut tapiiffiqineqarnikkut tapiissutinik pissarsisimasut paasissutissiisussaataitanerannik eqqussisoqarpoq.

Siunnersuutigineqarpoq ilaasortaqa qaammatisiutit ukiuata naaneraniit qaammatit sisamat qaangiutsinnagit partiip nuna tamakkerlugu kattuffianut uku pillugit paasissutissanik nassiussaqaasasq:

- Tapiissutit ilaasortap ukiumi pineqartumi pissarsiarisimasaasa tamarmik tamarmiullutik annertussusii.
- Inatsisilerinikkut inuttut isigineqarsinnaasut (ass. ingerlatseqatigiiffiit, peqatigiiffiit kattuffiillu) ilaasortap naalackersuinikkut sulineranut tapiissuteqartut aqqi najugallu, kiisalu tapiissutit tapiissuteqartumit pineqartumit pissarsiarisimasaasa annertussusii.
- Inuit tigussaasut (innuttaasut) ilaasortap naalackersuinikkut sulineranut tapiissuteqartut aqqi najugallu, kiisalu tapiissutit tapiissuteqartumit pineqartumit pissarsiarisimasaasa annertussusii. Tamannali taamaallaat atuuppoq ilaasorta qatigut tapiissuteqartumit ataatsimit katillugit 1.000 sinnerlugu tapiissutisimappat.

Siunnersuutigineqarpoq tamanna aamma atuutissasoq inunnut partiimut ilaasortaannikkaluarlutik Folketingimut Inatsisartunulluunniit qinersinermi kingullermi partii sinnerlugu qinigassannngortissimasunut.

Kiisalu § 1, nr. 7-imi siunnersuutigineqarpoq partiit ukiumoortumik naatsorsuutaanni paasissutissisussaataaneq annertusineqassasoq tapiissutit ilaasortat qinigassannngortittulluunniit ataasiakkaat inunnit inatsisitigulluunniit inuttut isigineqarsinnaasunit naalackersuinermik suliaqarnerminnut pissarsiarisimasaannut tunngatillugu paasissutissanik partiip nuna tamakkerlugu kattuffiata pissarsiarisimaasanik paasissutissaajunnartut aamma ilanngunneqartussannngorlugit.

## 2.5. Ukiumoortumik naatsorsuutit kukkunersiorneqarsimanissaannik piunasaqaat

### A) Inatsisiliornerit atuuttut

Naalackersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaanni atuuttumi (Inatsisartut inatsisaat nr. 15, 22. november 2011-meersoq) § 1-imi piunasaqaatit aalajangersarneqarpoq partiit Kalaallit Nunaanni Folketingimut Inatsisartunulluunniit qinersinermi kingullermi qinigassannngortitaqarsimasut ukiumoortumik naatsorsuusiortassasut. Inatsisartut inatsisaanni § 1 tamatuma saniatigut paasissutissanik sunik ukiumoortumik naatsorsuutit imaqaarnissaannut piunasaqaatinik assigiinngitsunik aalajangersaaviuvoq.

Ukiumoortumik naatsorsuutit inatsisartut inatsisaanni § 2 naapertorlugu partiip aqutsisunit atsiorneqarsimasussaapput ukiumoortumillu naatsorsuutini taaneqarsimasut saniatigut partiip allanik isertitaqaranilu aningaasartuuteqarsimannnginneranilluunniit nalunaarummik imaqaassalluni.

Kiisalu Inatsisartut inatsisaanni § 3-mi aalajangersarneqarpoq partii ukiup naatsorsuuteqarfiusup naanerata kingorna qaammatit arfinillit qaangiutsinnagit

ukiumoortumik naatsorsuutit assilinerinik Inatsisartunut nassiussaqaassasoq Inatsisartullu Siulittaasoqarfiata ukiumoortumik naatsorsuutit tamanut saqqummiutissagai.

Inatsisartut inatsisaat ukiumoortumik naatsorsuutit kukkunersiorneqarsimanissaannik aalajangersakkanik imaqaanngilaq.

Naalackersuinikkut sulinermut aningaasatigut tapiissuteqartarnej pillugu Inatsisartut inatsisaanni atuuttumili (Inatsisartut inatsisaat nr. 1, 31. maj 2001-meersoq, kingusinnerusukkut allannguutitalik) § 9, imm. 2-mi aalajangersarneqarpoq Inatsisartuni partiit attaviitsullu inatsisartut inatsisaat malillugu Inatsisartuni naalackersuinikkut sulinermut pisortanit tapiissutinik pissarsisartut ukiut tamaasa kingusinnerpaanik 30. juni ukiumut qaangiuttumut naatsorsuutinik Inatsisartut Siulittaasoqarfiannut nassiussisartussaapput, naatsorsuutillu taakku kukkunersiorneqarsimasussaallutik.

Inatsisartut inatsisaanni ukiumoortumik naatsorsuutit paasissatissanik sunik imaqarnissaannut piumasaqaatinik aalajangersaasoqarsimanngilaq.

#### B) Siunnersuuteqartup isumaliutai

Naalackersuinikkut suliniaqatigiiffiit partiit naatsorsuutaasa tamanut saqqummiunneqartarnerat pillugu Inatsisartut inatsisaanni piumasaqaatit, taamaullu aamma naalackersuinikkut sulinermut aningaasatigut tapiissuteqartarnej pillugu Inatsisartut inatsisaanni piumasaqaatit naammassiniarlugit Inatsisartuni partiit ukiut tamaasa naatsorsuutinik ataatsinik nassiussisarnej nalinginnaasumik suleriaaseraat. Ukiumoortumik naatsorsuutit taakku naalackersuinikkut sulinermut aningaasatigut tapiissuteqartarnej pillugu Inatsimmi piumasaqaat naapertorlugu kukkunersiorneqarsimasarput.

Tunggaviusumillu partiip toqqarsinnaavaa tamatumunnga taarsiullugu ukiumoortumik naatsorsuutinik marlunnik nassiussaqaarnissani: Naalackersuinermik suliaqarnermut aningaasatigut tapiissuteqartarnej pillugu Inatsisartut inatsisaat naapertorlugu partiip pisussaaffii naammassiniarlugit ukiumoortumik naatsorsuutit kukkunersiorneqarsimasut, kisiannili inunnit inatsisitigullu inuttut isigineqarsinnaasunit tapiissutit partiip pissarsiarisimasai pillugu paasissutissanik imaqaanngitsut. Kiisalu naalackersuinikkut suliaqatigiiffiit partiit naatsorsuutaasa tamanut saqqummiunneqartarnerat pillugu Inatsisartut inatsisaat naapertorlugu partiip pisussaaffii naammassiniarlugit ukiumoortumik naatsorsuutit inunnit inatsisitigullu inuttut isigineqarsinnaasunit tapiissutit partiip pissarsiarisimasai pillugu paasissutissanik imaqartut kukkunersiorneqarsimanngitsulli.

Naalackersuinikkut suliniaqatigiiffiit partiit naatsorsuutaasa tamanut saqqummiunneqartarnerat pillugu Inatsisartut inatsisaata partiit naalackersuinikkut sulinerannik kikkut aningaasalersuisuunerannik innuttaasut paasisimasqaarnissaata qularnaarneqarnissaa siunertaraa. Inatsisartut inatsisaatigut tamanna siunertaralugu partiit pisussaaffilerneqarput paasissutissat assigiinngitsunik tamanut saqqummiunneqartussanik

tunniussinissaminut. Tamatumanili piumasaqaataavoq paasissutissat partiit tunniussaasa eqqortuunerannik innuttaasutb tatiginnissinnaanerat. Tamanna ikorfartorneqarsinnaavoq ukiumoortumik naatsorsuutit naalackersuinikkut suliniaqatigiiffiit partiit naatsorsuutaasa saqqummiunneqartarnerat pillugu Inatsisartut inatsisaat malillugu partiip nassiussaasa kukkunersiorneqarsimanissaannik piumasaqaammik erseqqilluinnartumik ilanngussinikkut.

#### C) Siunnersuut

Siunnersuummi § 1, nr. 2-kkut erseqqissarneqarpoq ukiumoortumik naatsorsuutit tamanut saqqummiunneqarnissaat siunertaralugu partiip suliaralugillu Inatsisartut Siulittaasoqarfiannut nassiutassai kukkunersiorneqarsimassasut.

Paasissutissat ukiumoortumik naatsorsuutinut ilaatinneqartussat – partiimut inunnit inatsisilerinikkullu inuttut isigineqarsinnaasut tapiissutit pillugit paasissutissat – kukkunersiorneqarsimanissaasa qularnaarneqarnissaanik siunnersuut siunertaqarpoq.

### **3. Pisortanut aningaasatigut allaffissornikkullu kingunerisassai**

Siunnersuutip pisortanut aningaasatigut allaffissornikkullu kinguneqarnissaa naatsorsuutigineqanngilaq.

### **4. Inuussutissarsiortunut aningaasatigut allaffissornikkullu kingunerisassai**

Siunnersuutip inuussutissarsiortunut aningaasatigut allaffissornikkullu kinguneqarnissaa naatsorsuutigineqanngilaq.

### **5. Avatangiisinut, pinngortitamut inuillu peqqissusiannut kingunerisassai**

Siunnersuutip avatangiisinut pinngortitamullu kinguneqarnissaa naatsorsuutigineqanngilaq.

### **6. Innuttaasunut kingunerisassai**

Siunnersuutip innuttaasunut kinguneqarnissaa naatsorsuutigineqanngilaq.

### **7. Kingunerisassai pingaarutillit allat**

Siunnersuutikkut naalackersuinikkut ingerlatsinermut nunanit allanit kinaassutsimillu isertuussilluni tapiissuteqarsinnaaneq mattunneqarpoq.

Siunnersuutikkut peqatigitillugu partiit inunnit inatsisilerinikkullu inuttut isigineqarsinnaasunit katillugit 200.000-it sinnerlugit tapiissuteqartullu ataasiakkaat eqqarsaatigalugit 20.000 kr.-it sinnerlugit tapiissutinik pissarsisinnaanerat mattunneqarpoq.

Siunnersuutikkut taamatuttaaq innuttaasut inatsisilerinikkut inuttut isigineqarsinnaasut (ass. ingerlatseqatigiiffiit soqutigisaqatigiiffiillu) naalackersuinikkut suliaqarnermut tapiissutaat pillugit paasisaqarsinnaanerat nukittorsarneqarpoq, tassami piumasaqaataalermat partiit naatsorsuutaat inatsisilerinikkut inuttut isigineqarsinnaasunit tapiissuteqartoqartillugu tapiissutit annertussusaat apeqqutaatinnagu tamatigut tapiissuteqartoq tapiissutillu

annertussusaat pillugit paasissutissanik imaqartassasut. Inatsisilerinikkut inuttut isigineqarsinnaasut eqqarsaatigalugit taamaalilluni 10.000 kr.-inut killigititaaq atuukkunnaarsinneqassaaq. Inuit tigussaasut eqqarsaatigalugit killigititaaq 1.000 kr.-inut appartinneqarpoq. Innuttaasut ataasiakaat taamaalillutik sulii naalakkersuineramik ingerlataqarnermut 1.000 kr.-it tungaannut tapiissuteqarsinnaassapput, innuttaasup tapiissutaasa annertussusii, aqqa najugaalu partiip naatsorsuutaani tamanit takuneqarsinnaasumik paasissutissiissutiginnikkaluarlugit.

Siunnersuutikkut taamatuttaaq partiimut ilaasortat qinigassanngortissimasulluunniit ataasiakkaat naalakkersuinerinikkut ingerlatsinerannut tapiissutinut tunngatillugu paasissutissiisussaaitaanermik eqqussisoqarpoq.

Suliniutit taakku tamarmik sanioqputaarinnissap pinngitsoortinneqarnissaanik siunertaqarput, taamaalillutillu peqquserlulluni iluanaarniarnermut (nammineq iluanaarnissaq piinnarlugu pissaanermik atornerluineq) inatsisartut inatsiaata illersuutaanissaanik nukittorsaataallutik.

#### **8. Oqartussanik suliniaqatigiiffinnillu il.il. tusarniaaneq**

Siunnersuutip tuaviortutut pissuseqarnerata tusarniaanissamik ingerlataqarnissamik piffissaq eqqarsaatigalugu periarfissaqarsimanngilaq.

### **Siunnersuummi aalajangersakkanut ataasiakkaanut nassuiaatit**

#### *§ 1-imut*

Nr. 1-imut

Inatsisartut inatsisaata atuuttup qulequtaata allanngortinneqarnissaa siunnersuutigineqarpoq, § 1, nr. 10-mi inatsisartut inatsisaata atuuffiata annertusineqarnissaanik siunnersuutip malitsigisaanik (§ 4 b-mik 4 c-millu ilanngussineq).

Nr. 2-mut

Siunnersuutigineqarpoq erseqqissarneqassasoq ukiumoortumik naatsorsuutit tamanut saqqummiunneqarnissaat siunertaralugu partiimit suliarineqarlutillu Inatsisartut Siulittaasoqarfiannut nassiuunneqartussat tassaassasut ukiumoortumik naatsorsuutit *kukkunersiukkat*.

Nr. 3-mut

Inatsisartut inatsisaata kalaallisuuani taaguutit atornerqartut iluarsineqarnissaat siunnersuutigineqarpoq, Inatsisartut inatsisaanni taaguutit atornerqartut assigiissarneqarnissaat siunertaralugu.

Nr. 4-mut

§ 1, imm. 1-mi atuuttumi aalajangersarneqarpoq partiip ukiumoortumik naatsorsuutai isertitat assigiinngitsut erseqqinnerusut pillugit paasissutissanik imaqartassasut, taakkununga § 1, imm. 1, nr. 4-mi nunani tamalaani suleqatigiiffinit, inuinnaat ataatsimoorussamik peqatigiiffiinit, suliatigut kattuffinit, inuussutissarsiortut suleqatigiiffiinit, inuussutissarsiortut suliffeqarfinit, aningaasaateqarfinniit peqatigiiffinniillu tapiissutit ilanngullugit.

Siunnersuutikkut taakkartorneqartunit nunat tamalaat akornanni suliniaqatigiiffiit peerneqarput. Tamanna siunnersuummi § 1, nr. 10-p (§ 4 b-p nutaap) malitsigaa, taannami malillugu nunanit allanit tapiissteqartunit tapiissutinik partii pissarsisinnaajunnaarmat.

Oqaasertalerneqarnissaanut siunnersuutigineqartumi inatsisilerinikkut inuttut isigineqarsinnaasunit, taakkununga ilanngullugit ataatsimut kattuffinit namminersortunit, sulianut atatillugu suliniaqatigiiffinit, inuussutissarsiortut suliniaqatigiiffiinit, inuussutissarsiortut suliffeqarfinit, aningaasaateqarfinit peqatigiiffinniillu, tapiissutit ilaatinneqarput.

Nalunaarsuineq tamakkiisuunngilaq, taamaalilluni inatsisilerinikkut inuttut isigineqarsinnaasunit allanit tapiissutaajunnartut aalajangersakkamut aamma ilaatinneqarlutik.

Pisortanit partiinut tapiissutit inatsisartut inatsisaanni § 1, imm. 1, nr. 1-imut ilaatinneqarput.

Nr. 5-imut

Inatsisartut inatsisaanni atuuttumi § 1, imm. 2-mi aalajangersarneqarpoq partiip ukiumoortumik naatsorsuutai, tapiissuteqartut ukiumi naatsorsuuteqarfiusumi partiimut katillugit 10.000 kr. sinnerlugit tapiissuteqarsimasut ataasiakkaat aqqi najugaallu pillugit paasissutissanik imaqassasut.

Siunnersuutikkut paasissutissiisuteqarnissamik piunasaqaat annertusineqarpoq, tapiissuteqartup aqqa najugaalu kisiisa nalunaariginagit kisiannili aamma tapiissuteqartumit pineqartumit tapiissutit tamarmiusut annertussusiat nalunaarutigineqartartussanngortillugit.

Peqatigitillugu aalajangersagaq killilerneqarpoq inunnit inatsisilerinikkulluunniit inuttut isigineqarsinnaasunit tapissutinut taamaallaat tunngasunngorlugu, tamannalu siunnersuummi § 1, nr. 5-imut (§ 1, imm. 3 nutaamut), inatsisilerinikkut inuttut isigineqarsinnaasunit tapiissutit eqqarsaatigalugit paasissutissiisussaatitaanermik malittarisassiiviusumut, sanilliullugu isigineqassaaq.

Inatsisartut inatsisaanni atuuttumi § 1, imm. 2-mi aalajangersarneqarsimavortaaq partiip ukiumoortumik naatsorsuutai kinaassutsimik isertuussilluni tapiissutaajunnartut tamarmiusut

annertussusii pillugit paasissutissanik aamma kinaassutsimik isertuussilluni 10.000 kr. sinnerlugit tapiissutit ataasiakkaat annertussusii pillugit paasissatissanik imaqassasut.

Siunnersuutikkut siunnersuummi § 1, nr. 9-p, (§ 4 b nutaap), taanna naapertorlugu partii kinaassutsimik isertuussilluni tapiissutinik pissarsisinnaajunnaassalluni, kinguerisaanik piunasaqaat taanna peerneqarpoq.

Nr. 6-imut

Inatsisartut inatsisaanni atuuttumi § 1, imm. 2-mi aalajangersarneqarpoq partiip ukiumoortumik naatsorsuutai tapiissuteqarsimasut kikkulluunniit ukiumi naatsorsuuteqarfiusumi katillugit 10.000 kr. sinnerlugit tapiissuteqarsimasut aqqi najugaallu pillugit paasissutissanik imaqassasut.

Siunnersuutikkut inatsisilerinikkut inuttut isigineqarsinnaasunit (taakkununga ilanngullugit ataatsimut kattuffinnit namminersortunit, sulianut atatillugu suliniaqatigiiffinnit, inuussutissarsiortut suliniaqatigiiffiinit, inuussutissarsiutigalugu suliffeqarfinnit, aningaasaateqarfinnit peqatigiiffinnillu) tapiissutit eqqarsaatigalugit aalajangersakkamik nutaamik ilanngussisoqarpoq (§ 1, imm. 3 nutaaq) tapiissutigineqarsinnaasunut killiliunneqarsimasut peerlugit.

Partiip ukiumoortumik naatsorsuutai tamatuma kingorna inatsisilerinikkut inuttut isigineqarsinnaasup tapiissutit annertussusiat apequtaatinnagu ukiumi naatsorsuuteqarfiusumi tapiissuteqarsimasup kialluunniip aqqa najugaalu pillugit paasissutissanik imaqartartussaassapput.

Tapiissutit annertussusaat taamatuttaaq paasissutissiissutigineqartussaassapput.

Nr. 7-imut

Inatsisartut inatsisaanni atuuttumi § 1, imm. 4-mi aalajangersarneqarsimavortaaq partiip ukiumoortumik naatsorsuutai ilassutitut nassuiaammi, paasissutissat partiip nuna tamakkerlugu kattuffiata § 4 malillugu tigusimasai pillugit paasissutissanik, tassa tapiissutaajunnartut partiip najukkami inuusuttunulluunniit immikkoortortoqarfiata inunnit inatsisitigulluunniit inuttut isigineqarsinnaasunit pissarsiarisimasai pillugit paasissutissaajunnartunik imaqassasut, najukkami inuusuttunulluunniit immikkoortortoqarfik katillugit 40.000 kr. sinnerlugit tapiissutinik pissarsisimappat.

Siunnersuutikkut partiip ukiumoortumik naatsorsuutai eqqarsaatigalugit paasissutissiisussaataaneq annertusineqarpoq paasissutissaajunnartut partiip nuna tamakkerlugu kattuffiata § 4 a (siunnersuummi § 1, nr. 9) malillugu tigusimasai ilaasussanngortillugit, tassa tapiissutaajunnartut partiimut ilaasortat qinigassanngortittullu ataasiakkaat naalackersuinikkut suliaqarnermut tapiissutit inunnit inatsisitigulluunniit inuttut isigineqarsinnaasunit pissarsiarisimaat pillugit paasissutissanik.

Nr. 8-imut

Inatsisartut inatsisaanni atuuttumi § 4-mi aalajangersarneqarpoq, partiip najukkami inuusuttunulluunniit immikkoortortoqarfiata partiip nuna tamakkerlugu kattuffianut tapiissutaajunnartut najukkami inuusuttunulluunniit immikkoortortoqarfiup inunnit inatsisilerinikkulluunniit inuttut isigineqarsinnaasunit pissarsiarisimasai pillugit paasissutissanik nassiussaqaassaaq, najukkami inuusuttunulluunniit immikkoortortoqarfik katillugit 40.000 sinnerlugit tapiissutinik pissarsisimappat. Paasissutissat partiip ukiumoortumik naatsorsuutaanut ilaatinneqassapput.

Paasissutissat najukkami inuusuttunulluunniit immikkoortortaqaqarfimmit nassiunneqartussat inatsisartut inatsisaanni § 4, nr. 1-4-mi nalunaarsorneqarsimapput. § 4, nr. 2-p malitsigissavaa najukkami inuusuttunulluunniit immikkoortortoqarfik tapiissutit ataasiakkaat annertussusii pillugit paasissutissanik nassiussaqaassammat tapiissuteqartut aqqi najugaallu ilanngullugit, immikkoortortaqarfik tapiissuteqartumit ataatsimit ataasiarluni arlaleriarluniluunniit katillugit 10.000 kr.-it sinnerlugit pissarsisimappat.

Siunnersuutikkut inatsisilerinikkut inuttut isigineqarsinnaasunit, (taakkununga ilanngullugit ataatsimut kattuffinnit namminersortunit, sulianut atatillugu suliniaqatigiiffinnit, inuussutissarsiortut suliniaqatigiiffiinit, inuussutissarsiutigalugu suliffeqarfinnit, aningaasaateqarfinnit peqatigiiffinnillu) tapiissutit eqqarsaatigalugit paasissutissiisussaataaneq annertusineqarpoq.

Najukkami inuusuttunulluunniit immikkoortortoqarfiit taamaalillutik inatsisilerinikkut inuttut isigineqarsinnaasut ukiumi naatsorsuuteqarfiusumi partiimut, tapiissutit annertussusii apequtaatinnagit, tapiissuteqarsimasut tamarmik aqqi najugaallu pillugit partiip nuna tamakkerlugu kattuffianut paasissutissiisalissapput.

Tapiissutit annertussusiat taamatuttaaq paasissutissiisutigineqartussaassaaq.

Inuinnarnit (inunnit tigussaasunit) tapiissutit eqqarsaatigalugit 10.000 kr.-inut killigititaq attatiinneqarpoq.

Nr. 9-mut

Inatsisartut inatsisaanni atuuttumi § 4-mi aalajangersarneqarpoq partiip majukkami inuusuttunulluunniit immikkoortortoqarfia tapiissutaajunnartut najukkami inuusuttunulluunniit immikkoortortoqarfiup inuinnarnit inatsisilerinikkuulluunniit inuttut isigineqarsinnaasunit pissarsiarimasai pillugit partiip nuna tamakkerlugu kattuffianut paasissutissanik nassiussissasoq, najukkami inuusuttunulluunniit immikkoortortoqarfik katillugit 40.000 kr. sinnerlugit tapiissutinik tigusaqarsimappat. Paasissutisst partiip ukiumoortumik naatsorsuutaanut ilaassapput.

Paasissutissat najukkami inuusuttunulluunniit immikkoortorta qarfiimmit nassiunneqartussat inatsisartut inatsisaanni § 4, nr. 1-4-mi nalunaarsorneqarsimapput.

Siunnersuutikkut § 4, nr. 3-4 kinaassutsimik isertuussilluni tapiissutinut tunngasoq atuukkunnaarsinneqarpoq. Aalajangersakkat taakku atuukkunnaarsinneqarnissaannik siunnersuut siunnersuummi § 1, nr. 9-p kinguneraa (§ 4 b nutaaq), taannami malillugu partii kinaassutsimik isertuussilluni tapiissutinik pissarsisinnaajunnaarmata.

Nr. 10-mut

Siunnersuutikkut inatsisartut inatsisaanni immikkoortunik nutaanik pingasunik ilanngussisoqarpoq: Immikkoortoq ataaseq partiimut ilaasortat qinigassanngortittullu ataasiakkaat naalackersuineramik suliaqarnerannut tapiissutit inunnit inatsisilerinikkuulluunniit inuttut isigineqarsinnaasunit pissarsiaat pillugit paasissutissiisussaatitaanermik aalajangersagartalik (§ 4 a), immikkoortoq kinaassutsimik isertuussilluni nunanillu allanit tapiissuteqartunit tapiissutinik mattussisunik aalajangersagartalik (§ 4 b), kiisalu immikkoortoq partiimut inunnit inatsisilerinikkullu inuttut isigineqarsinnaasuni tapiissutinut killigitat pillugit aalajangersagartalik.

*§ 4 a-mut*

Aalajangersagaq nutaajuvoq.

Inatsisartut inatsisaanni atuuttumi § 4-mi aalajangersarneqarpoq partiip najukkami inuusuttunulluunniit immikkoortortoqarfiata tapiissutaajunnartut najukkami inuusuttunulluunniit immikkoortortoqarfiup inuinnarnit inatsisilerinikkulluunniit inuttut isigineqarsinnaasunit pissarsiarisimai pillugit paasissutissanik partiip nuna tamakkerlugu kattuffianut nassiussaqaassaaq (Taamaattorli aatsaat najukkami inuusuttunulluunniit immikkoortortoqarfik katillugit 40.000 kr.-it sinnerlugit tapiissutinik tigusaqarsimappat). Paasissutissat partiip ukiumoortumik naatsorsuutaanut ilaassapput.

Siunnersuutikkut partiimut ilaasortanut qinigassanngortittullu ataasiakkaanut taamaaqataanik pisussaaffimmik aalajangersaasoqarpoq. (Taakkuli eqqarsaatigalugit tapiissutit tiguneqartut tamarmiusut annertussusiat apeqqutaatinnagu paasissutissiisussaatitaaneq atuutissasoq siunnersuutigineqarpoq).

*Imm. 1-imut*

Imm. 1-imi siunnersuutiqarpoq partiimut ilaasortat naalackersuinerikkut sulinerminut allanit parteerinngisaminit tapiissutinik, ilaatigut qineqqusaarnermut tapiissutinik, immikkut pissarsisut paasissutissiinissamut pisussaaffeqarnerannik aalajangersaasoqassasoq.

Siunnersuutigineqarpoq ilaasortaq qaammatisiutit ukiuata naanerata kingorna qaammatit sisamat qaangiutsinnagit taakku pillugit partiip nuna tamakkerlugu kattuffianut paasissutissanik nassiussaqaassaaq

Ilaasortap siullermik tapiissutit tamarmiusut ilaasortap ukiumi pineqartumi pissarsiarisimasaasa katillugit amerlassusii paasissutissiissutigissavai.

Ilaasortap aappaatut tapiissuteqartut ataasiakkaat tapiissutillu ilaasortap taakkunannga pissarsiarisimasai pillugit paasissutissat aalajangersimasut paasissutissiissutigisartussaassavai:

Inatsisilerinikkut inuttut isigineqarsinnaasunit tapiissutit eqqarsaatigalugit, ilaasortap tapiissuteqartup aqqa najugaalu, kiisalu tapiissutit ilaasortap tapiissuteqartumit pissarsiarisimasaasa annertussusiat, paasissutiissutigissavai.

Tamanna aamma inunnit (tigussaasunit) tapiissutinut atuuppoq, taamaallaalli ilaasortaq tapiissuteqartumit ataatsimit ataasiarluni arlaleriarluniluunniit tapiissutinik katillugit 10.000 kr.-init amerlanerusunik pissarsisimappat.

#### *Imm. 2-mut*

Imm. 2-mi siunnersuutigineqarpoq aalajangersarneqassasoq imm. 1 taamaaqataanik atuutsinneqassasoq inunnut partiimut ilaasortaanngikkaluarlutik Folketingimut Inatsisartunulluunniit qinersinermi kingullermi partii sinnerlugu qinigassanngortissimasunut.

#### *§ 4 b-mut*

Aalajangersagaq nutaajuvoq.

#### *Imm. 1-imut*

Imm. 1-imi siunnersuutigineqarpoq partiit nunanit allanit kinaassutsimilluunniit isertuussilluni tapiissutinik tigusaqarsinnaatitaannginngitsut. Taamatut inerteqquteqarneq partiit najukkani inuusuttunullu immikkoortortaqarfiinut taamatuttaaq atuuppoq. Aammattaaq imm. 3-p malitsigissavaa aalajangersagaq taamaaqataanik atuutissammat partiimut ilaasortanut partiilu sinnerlugu qinigassanngortittunut ataasiakkaanut.

Nunanit allanit tapiissuteqartutut paasineqassapput tapiissuteqartut Kalaallit Nunaata avataani najugaqartut (imaluunniit inatsisilerinikkut inuttut isigineqarsinnaasut eqqarsaatigalugit: angerlarsimaffeqartut).

Kinaassutsimik isertuussilluni tapiissuteqartutut paasineqassappat tapiissuteqartut aqqi najugaallu tapiissutinik pissarsisumit nalorninaallisinneqarsinnaanngippata.

#### *Imm. 2-mut*

Imm. 2-mi siunnersuutigineqarpoq aalajangersarneqassasoq partiit, najukkani inuusuttunullu immikkoortortaqarfiit ilanngullugit, tapiissutinik imm. 1-imi taaneqartunik pissarsisut, tapiissutit pissarsiarineqarnerinit sapaatit akunnerisa sisamat qaangiutinnginnerani tapiissutinik utertitsissasut. Tapiissutit partiip utertissinnaanngikkai paasinarsissappat

tapiissutit nunatta karsianut nakkartinneqassapput, taamaalillunilu partiip pisussaaffigissallugu tapiissutit tiguneqarneriniit sapaatit akunneri arfineq-pingasut qaangiutsinnagit tapiissutit kontumut aningaasaqarnermut naalackersuisoqarfimmit innersuussutigineqartumut nuussallugit.

Pisussaaffik tamanna aamma partiip najukkani inuusuttunullu imikkoortorta qarfiinut nunanit allanit kinaassutsimilluunniit isertuussilluni tapiisstunik pissarsisimasunut atuuppoq. Aammattaaq imm. 3-p malitsigissavaa aalajangersagaq taamaaqataanik atuutissamat partiimut ilaasortanut partiilu sinnerlugu qinigassanngortittunut ataasiakkaanut.

Tapiissutit utertinneqarsinnaanngitsut pillugit aalajangersakkami oqaaseqatigiit aappaanni ilaatigut eqqarsaatigineqarput kinaassutsimik isertuussilluni taaiissutit aningaasanngorlugit partiimut tunniunneqartut. Tapiissutit aningaaserivikkoorlugit partiimut tunniunneqartut nalinginnaasumik utertinneqarsinnaassapput, kontu tapiissuteqarnermi nuussinermut ator neqarsimasoq piffissap ingerlanerani atuukkunnaarsinneqarsimanngippat.

”Aningaasaqarnermut naalackersuisoqarfittut” paasineqassaaq Naalackersuisut ataanni naalackersuisoqarfittut piffissami pineqartumi aningaasaqarnermut tunngasunut suliassaqarfittut akisussaassuseqartutut (Ullumikkut: Aningaasaqarnermut Akileraartarnermullu Naalackersuisoqarfik).

#### *Imm. 3-mut*

Imm. 3-mi siunnersuutigineqarpoq aalajangersarneqassasoq imm. 1 aamma 2 taamaaqataanik ukununga atuutissapput:

- 1) Folketingimut Inatsisartunulluunniit ilaasortanut taakkulu sinniisussaannut, aamma
- 2) inunnut Folketingimut Inatsisartunulluunniit qinersinissamat aggersumut qinigassanngortittunut.

Taamaalilluni nunanit allanit kinaassutsimilluunniit isertuussilluni tapiissuteqartunit tapiissutinik pissarsinissaq ajornartitaavoq, partiimullu atuuttut tapiissutit taamaattut ajornanngippat utertinneqarnissaat imaluunniit nunatta karsianut nuunneqarnissaat pisussaaffiulluni.

Aalajangersagaq Folketingimut Inatsisartunulluunniit ilaasortamut kimulluunniit, taakkununga sinniisussamat kimulluunniit, aamma kimulluunniit Folketingimut Inatsisartunulluunniit qinersinissamat aggersumut qinigassanngortittumut – pineqartoq partiimut sinniisuunersoq apeqqutaatinnagu. Aalajangersagaq taamaalilluni aamma atuutissaaq Folketingimi Inatsisartuniluunniit attaviitsuujunnartunut, inunnullu kisimiillutik qinigassanngortittunut.

#### *§ 4 c-mut*

Aalajangersagaq nutaajuvoq.

*Imm. 1-imut*

Imm. 1-imi siunnersuutigineqarpoq partii qaammatisiutit ukiuanni ataatsimi tapiissutininik katillugit 200.000 kr.-init sinnilinnik, imaluunniit tapiissuteqartut ataasiakkaat eqqarsaatigalugit 20.000 kr.-init sinnilinnik, pissarsiaqarsinnaatitaassanngitsut aalajangersarneqassasoq.

Partii taamaalilluni qaammatisiutit ukiuata iluani inunnit inatsisilerinikkulluunniit inuttut isigineqarsinnaasunit tapiissutininik katillugit 200.000 kr.-init amerlanerusunik pissarsisinnaatitaassanngilaq.

Partii taamatuttaaq inummit imaluunniit inatsisilerinikkut inuttut isigineqarsinnaasunit, ass. ingerlatseqatigiiffimmit peqatigiiffimmilluunniit, 20.000 kr.-it sinnerlugit ataasiartumik tapiissutininik pissarsisinnaatitaassanngilaq. Partii taamatuttaaq inummit inatsisilerinikkulluunniit inuttut isigineqarsinnaasunit tapiissutininik arlalinnik katillugit 20.000 kr.-init amerlanerusunik pissarsisinnaassanngilaq.

*Imm. 2-mut*

Imm. 2-mi siunnersuutigineqarpoq partii inummit inatsisilerinikkulluunniit inuttut isigineqarsinnaasunit 20.000 kr. sinnerlugit tapiissutininik pissarsisimappat, taava sapaatit akunneri sisamat qaangiutsinnagit tapiissutit ilaat sipporuttut partiip utertissagai.

Partii assersuutigalugu qaammatisiutit ukiuanni ataatsimi tapiissuteqartumit tassanga marloriarluni tapiissutininik tamarmik 15.000 kr.-inik annertussusilinnik pissarsisimappat, taava partii tapiissutit ilai sipporuttut 10.000 kr.-it utertissavai.

Paasinarsippat partiip tapiissutit ilaat sipporuttut utertinneqarsinnaanngikkai taakku nunatta karsianut nakkartinneqassapput, pissarsiarineqarnermillu kingorna sapaatit akunnerisa arfineq-pingasut qaangiutinnginnerini kontumut aningaasaqarnermut naalakkersuisoqarfimmit innersuussutigineqartumut nuunneqarnissaat partiip pisussaaffigissallugu.

Taamaaqataannik tamanna atuuppoq partii tapiissutininik pissarsisarnermigut katillugit 200.000 kr.-inut killiulissaq, inuit inatsisilerinikkulluunniit inuttut isigineqarsinnaasut tapiissutaannut qaammatisiut ukiuanni partiip pissarsiarisinnaasaannut atuuttoq, sipporneqarsimappat.

*Nr. 11-mut*

Siunnersuutillut pineqaatissiisarnermut aalajangersagaq annertusineqassaaq § 4 a-mik (ilaasortat qinigassanngortittullu paasissutissiisussaatitaanerat pillugu) siunnersuutigineqartumik, § 4 b, imm. 2-mik (kinaassutsimik isertuussilluni tapiissutit tapiissuteqartunillu nunanit allaneersunit tapiissutit pillugit) siunnersuutigineqartumik, § 4 c, imm. 2-tut (tapiissutinuit killissarititat pillugit) siunnersuutigineqartumik kiisalu § 4 a

siunnersuutigineqartoq malillugit paasissatissanik eqqunngitsunik amigaateqartunilluunniit tunniussinissamik unioqquitsinerit ilaatinneqalersillugit.

Kinaassutsimik isertuussilluni nunanillu allanit tapiissutit eqqarsaatigalugit oqaatigineqassaaq § 4 b, imm. 1-imik unioqquitsineq pineqaatissiisarnermut aalajangersakkamut ilaatinneqanngimmat. Taamaattumik tapiissutinik taamaattunik tigusaqarneq immi partiip (il.il.) akiliisussanngortinneqarneranik nassataqarsinnaanngilaq. Aatsaat partii (piffissaliussat aalajangersarneqarsimasut iluanni) tapiissutinik utertinngippat imaluunniit utertinneqarnissaat ajornarpat tapiissutit nunatta karsianut nuunngippatigut akiliisitaanermik pineqaatissinneqarsinnaavoq.

Tamanna aamma atuuppoq tapiissutinut killissarititat pillugit § 4 c, imm. 1-imik unioqquitsinermut.

§ 4 b, imm. 1-ip aamma § 4 c, imm. 1-ip pineqaatissiisarnermut aalajangersakkamut ilaatinneqannginnerisa nassataraattaq tapiissuteqartoq tamatuminnga unioqquitsinermut akiliisitaasussanngorlugu pineqaatissinneqarsinnaassanngimmat.

Nr. 12-imut

Inatsisartut inatsisaannik unioqquitsinermut akiliisitsissutit (massakkutut) naalagaaffiup karsianut nakkaratik nunatta karsianut nakkartinneqartarnissaat siunnersuutigineqarpoq.

Siunnersuutigineqarportaaq kinaassutsimik isertuussilluni nunanillu allanit tapiissuteqartunit tapiissutit utertinneqarnissaannik imaluunniit – tamanna ajornarpat – tapiissutit taamaattut nunatta karsianut tunniunneqarnissaannik pisussaaffeqarneq pillugu inatsisartut inatsisaanni aalajangersakkanik unioqquitsisoqartillugu tunissutit arsaarinnissutigineqarsinnaassasut.

Taamaqataanik siunnersuutigineqarpoq inunnit inatsisitigullu inuttut isigineqarsinnaasunit tapiissutit eqqarsaatigalugit pissarsiarineqarsinnaasunut killiliussat sipporneqarsimatillugit tapiissutit ilaasa sipporuttut utertinneqarnissaannik (imaluunniit – tamanna ajornarpat – tapiissuti ilaasa taakku nunatta karsianut tunniunneqarnissaannik) pisussaaffik pillugu inatsisartut inatsisaanni aalajangersakkat unioqquatinneqarsimatillugit tapiissutit ilaat taakku arsaarinnissutigineqarsinnaasut.

Aningaasat arsaarinnissutigineqartut nunatta karsianut nakkartinneqartarnissaat siunnersuutigineqarpoq.

## § 2-mut

Imm. 1-imut

Inatsisartut inatsisaata tamanut nalunaarutigineqarnermi aqaguani atuutilernissaa siunnersuutigineqarpoq.

Imm. 2-mut

Inatsisissatut siunnersuummi aalajangersakkat naalackersuinikkut sulinermut inunnit inatsisilerinikkullu inuttut isigineqarsinnaasunit pissarsiarineqartut pillugit paasissutissiisussaataaermik sukaammiiiviusut tapiissutinut ukiumi naatsorsuuteqarfiusumi 2025-imi tiguneqarsimasunut siullerpaamik atuutissasoq siunnersuutigineqarpoq.

<b>Inatsisissatut siunnersuut inatsimmut atuuttumut sanilliullugu</b>	
<i>Oqaasertalerneru atuuttut</i>	<i>Inatsisissatut siunnersuut</i>
	<p style="text-align: center;"><b>§ 1</b></p> <p>Naalackersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaanni nr. 15-imi 22. november 2011-meersumi tulliuttut allanngortinneqassapput:</p>
<p>Naalackersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaat</p>	<p><b>1.</b> Inatsisartut inatsisaata qulequtaa imatut oqaasertalerneqassaaq:          ””Naalackersuinikkut suliniaqatigiiffiit, partiit, naatsorsuutaasa tamanut saqqummiunneqartarneri naalackersuinikkullu sulinermit inuit inatsisilerinikkullu inuttut isigineqarsinnaasut tapiissutaat pillugit Inatsisartut inatsisaat”</p>
<p>§ 1, imm. 1, oqaaseqatigiit siulliit:           Partiit, Folketingimut imaluunniit Inatsisartunut kingullermik qinersinermi Kalaallit Nunaanni qinigassannqortitsisimasut partiip nuna tamakkerlugu kattuffiata isertitai aningaasartuutaalu pillugit ukiut tamaasa ukiumoortumik naatsorsuutinik saqqummiussisassapput.</p>	<p><b>2.</b> § 1, imm. 1, oqaaseqatigiit siulliit, imatut oqaasertalerneqassapput:          ” Partiit Folketingimut Inatsisartunulluunniit Kalaallit Nunaanni qinersinermi kingullermi qinigassannqortitaqarsimasut qaammatisiutit ukiui tamaasa partiip nuna tamakkerlugu kattuffiata isertitaanut aningaasartuutaanullu ukiumoortumik naatsorsuutinik kukkunersiukkanik saqqummiussaqaartassapput.”</p>
<p>3) Aammattaarlu inuinnarnit akileeqataassutit.</p>	<p><b>3.</b> § 1, imm. 1, nr. 3, imatut oqaasertalerneqassaaq:          “3) Qulaani taaneqartut saniatigut inuinnarnit tapiissutit allat.”</p>
<p>4) Nunani tamalaani suleqatigiiffinnit, inuinnaat ataatsimoorussamik peqatigiiffiinit, suliatigut kattuffinnit, inuussutissarsiortut suleqatigiiffiinit,</p>	<p><b>4.</b> § 1, imm. 1, nr. 4, imatut oqaasertalerneqassaaq:          ” 4) Inatsisilerinikkut inuttut isigineqarsinnaasunit, taakkununga ilanngullugit ataatsimut kattuffinnit</p>

<p>inuussutissarsiorluni suliffeqarfinit, aningaasaateqarfinniit peqatigiiffinniillu akileeqataassutit.</p>	<p>namminersortunit, sulianut atatillugu suliniaqatigiiffinit, inuussutissarsiortut suliniaqatigiiffiinit, inuussutissarsiutigalugu suliffeqarfinit, aningaasaateqarfinit peqatigiiffinnillu, tapiissutit.”</p>
<p><i>Imm. 2. Partii ukiumi naatsorsuiffimmi akiliuteqartumit ataatsimiit akileeqataassummik imaluunniit akileeqataassutinik arlalinnik katillugit 10.000 kr.-inik amerlanerusunik pissarsisimappat akiliisup aqqa najugaalu ukiumoortumik naatsorsuutinit takuneqarsinnaassaaq. Kinaasutsiminnik nalunaaruteqaratik akiliuteqartunit akileeqataassutit tamarmiusut annertussusaat pillugu paasissutissanik aamma 10.000 kr.-it sinnerlugit kinaassutsiminik nalunaaruteqanngitsumit ataasiakkaanit akileeqataassutit annertussusaat pillugit paasissutissanik aamma ukiumoortumik naatsorsuutit imaqassapput.</i></p>	<p><b>5.</b> § 1, imm. 2, imatut oqaasertalerneqassaaq: ” <i>Imm. 2. Partii ukiumi naatsorsuuteqarfiusumi tapiissuteqartumit ataatsimit ataasiarluni arlaleriarluniluunniit tapiissutinik imm. 1, nr. 3-mut ilaatinneqartunik katillugit 1.000 kr.-init amerlanerusunik pissarsisimappat, tapiissuteqartup aqqa najugaalu ukiumoortumik naatsorsuutini takuneqarsinnaassapput tapiissuteqartumit tapiissutit tamarmiusut nalunaarlugit.</i>”</p>
	<p><b>6.</b> § 1-imi imm. 2-p kingornanut immikkoortutut nutaatut ilanngunneqassaaq: ” <i>Imm. 3. Partii ukiumi naatsorsuuteqarfiusumi tapiissuteqartumit ataatsimit ataasiarluni arlaleriarluniluunniit tapiissutinik imm. 1, nr. 4-mut ilaatinneqartunik pissarsisimappat, tapiissuteqartup aqqa najugaalu ukiumoortumik naatsorsuutini takuneqarsinnaassapput tapiissuteqartumit tapiissutit tamarmiusut nalunaarlugit.</i>”</p> <p>Imm. 3-4 tamatuma kingorna imm. 4-5-inngussapput.</p>

<p><i>Imm.4.</i> Ukiumoortunik naatsorsuutit ilassutitut nalunaarsukkatut partiip nuna tamakkerlugu kattuffiata § 4 malillugu pissarsiarisimasaanik paasissutissanik imaqassapput.</p>	<p><b>7.</b> § 1, imm. 4, imm. 5-inngortussat imatut oqaasertalerneqassaaq:  ” <i>Imm. 4.</i> Ukiumoortunik naatsorsuutit ilassutitut nassuiaammik paasissutissaajunnartunik partiip nuna tamakkerlugu kattuffiata § 4 aamma § 4 a malillugit tigusimasaanik imaqassapput.”</p>
<p><b>§ 4.</b> § 1, imm. 1-mi ilaasup partiip immikkoortortaarfia imaluunniit inuusuttunut immikkoortortaarfia ukiumi ilivitsumi § 1, imm. 1, nr. 3-4-mi taaneqartunik akileeqataassutininik, katillugit 40.000 kr.-inik amerlanerusunik tigusaqarsimappat, immikkoortortaarfik ukiup ilivitsup naaneraniit kingusinnerpaamik qaammatit sisamat qaangiutsinnagit partiip nuna tamakkerlugu kattuffianut makku pillugit paasissutissanik nassiussissaaq:</p> <ol style="list-style-type: none"> <li>1) Akileeqataassutit tamarmiullutik annertussusaat.</li> <li>2) Akileeqataassutsip ataatsip annertussusaa, akileeqataasup aqqa najugaalu allallugit, immikkoortortaarfik akileeqataasumit ataatsimiit akileeqataassummik imaluunniit akileeqataassutininik arlalinnik katillugit 10.000 kr.-inik amerlanerusunik pissarsisimappat.</li> <li>3) Kinaassutsiminnik nalunaaruteqanngitsunit akileeqataassutit tamarmiusut annertussusaat.</li> <li>4) Kinaassutsiminnik nalunaaruteqanngitsunit ataasiakkaanit tamanit ataasiarluni akileeqataassutit 10.000 kr.-inik amerlanerusut annertussusaat.</li> </ol>	<p><b>8.</b> § 4, nr. 2, imatut oqaasertalerneqassaaq:  ”2) Aningaasatigut tapiissutit ataasiakkaat annertussusii, tapiissuteqartup aqqa najugaalu nalunaarlugit:  a) immikkoortortaarfik tapiissuteqartumit ataatsimit ataasiarluni arlaleriarluniluunniit tapiissutininik imm. 1, nr. 3-mut ilaatinneqartunik katillugit 1.000 kr.-init amerlanerusunik pissarsisimappat, imaluunniit  b) immikkoortortaarfik tapiissutininik § 1, nr. 4-mut ilaatinneqartunik pissarsisimappat.”</p> <p><b>9.</b> § 4, nr. 3-4, atuukkunnaarsinneqassapput.</p>
	<p><b>10.</b> § 4-p kingornanut immikkoortututu nutaatut ilanngunneqassaaq:  ”</p>

*Ilaasortat qinigassanngartissimasullu  
paasissutissiisussaataanerat*

**§ 4 a.** Partiimut § 1, imm.1-imut  
ilaatinneqartumut ilaasortaq  
naalakkersuinikkut sulinerminut allanit  
parteerinngisaminit tapiissutinik, ilaatigut  
qineqqusaarnermut tapiissutinik,  
qaammatisiutit ukiuanni pissarsisimappat,  
ilaasortaq qaammatisiutit ukiuata naanerata  
kingorna qaammatit sisamat  
qaangiutsinnagit uku pillugit partiip nuna  
tamakkerlugu kattuffianut paasissutissanik  
nassiussaqaassaaq:

1) tapiissutit tamarmiullutik annertussusii,  
aamma

2) tapiissutit ataasiakkaat annertussusii,  
tapiissuteqartut aqqi najugaallu  
nalunaarlugit:

a) ilaasortaq tapiissuteqartumit ataatsimit  
ataasiarluni arlaleriarluniluunniit  
tapiissutinik imm. 1, nr. 3-mut  
ilaatinneqartunik katillugit 1.000 kr.-init  
amerlanerusunik pissarsisimappat,  
imaluunniit

b) ilaasortaq tapiissutinik § 1, nr. 4-mut  
ilaatinneqartunik pissarsisimappat.

Imm. 2. Inuit partiimut  
ilaasortaannikkaluarlutik Folketingimut  
Inatsisartunulluunniit qinersinermi  
kingullermi partii sinnerlugu  
qinigassanngartissimasut ilaasortanut  
naligitinneqassapput.

*Kinaassutsimik isertuussilluni tapiissutit  
nunanillu allanit tapiissutit*

**§ 4 b.** Partiit, najukkani inuusuttunullu  
immikkoortorta qarfiit ilanngullugit, nunanit  
allanit kinaassutsimilluunniit isertuussilluni  
tapiissutinik pissarsisinnaatitaangillat.

*Imm. 2.* Partiit, najukkani inuusuttunullu immikkoortorta qarfiit ilanngullugit, nunanit allanit kinaassutsimilluunniit isertuussilluni tapiissutinik imm. 1-imi taaneqartunik pissarsippata, partiip tapiissutit pissarsiarineqarnerinit sapaatit akunnerisa sisamat qaangiutinnginnerani tapiissutit utertissavaat. Tapiissutit utertinneqarsinnaanngitsut nunatta karsianut nakkartinneqassapput, tiguneqarnermillu kingorna sapaatit akunnerisa arfineq-pingasut qaangiutinnginneranni kontumut aningaasaqarnermut naalakkersuisoqarfimmit innersuussutigineqartumut nuunneqassallutik.

*Imm. 3.* Imm. 1 aamma 2 taamaaqataanik ukununga atuutissapput:

- 1) Folketingimut Inatsisartunulluunniit ilaasortanut taakkulu sinniisussaannut, aamma
- 2) inunnut Folketingimut Inatsisartunulluunniit qinersinissamut aggersumut qinigassanngortittunut.”

*Tapiissutinut pissarsiarineqarsinnaasunut killiliussat*

**§ 4 c.** Partii qaammatisiutit ukiuanni ataatsimi tapiissutinik § 1, imm. 1, nr. 3-4-mut ilaatinneqartunik katillugit 200.000 kr.-init sinnilinnik, imaluunniit tapiissuteqartut ataasiakkaat eqqarsaatigalugit 20.000 kr.-init sinnilinnik, pissarsiaqarsinnaatitaanngillat.

*Imm. 2.* Partii tapiissutinut pissarsiarineqarsinnaasunut killiliussa q imm. 1-imi taaneqartoq sipporlugu pissarsippat, tapiissutit pissarsiarineqarnerisa kingorna sapaatit akunneri sisamat qaangiutsinnagit tapiissutit ilaat sipporuttut partiip utertissavai. Tapiissutit ilaat sipporuttut utertinneqarsinnaanngitsut nunatta karsianut

	<p>nakkartinneqassapput,  pissarsiarineqarnermillu kingorna sapaatit  akunnerisa arfineq-pingasut  qaangiutinnginnerini kontumut  aningaasaqarnermut  naalakkersuisoqarfimmit  innersuussutigineqartumut  nuunneqassallutik.</p>
<p>§ 5, imm. 1:</p> <p>Akiliisitsisoqarsinnaavoq:</p> <p>1) § 2, § 3, imm. 1 aamma § 4 unioqqutinneqarpata.  2) §§ 1 aamma 4 malillugit paasissutissanik eqqunngitsunik amigaateqartunilluunniit tunniussisoqarpat.  3) § 2 malillugu eqqunngitsunik nalunaaruteqartoqarpat.</p>	<p><b>11.</b> § 5, imm. 1, imatut oqaasertalerneqassaaq:  ” Tulliuttunut akiliisitaanermik pineqaatissiisoqarsinnaavoq:  1) § 2-mik, § 3-mi oqaaseqatigiit siulliannik, § 4-mik, § 4 a-mik aamma § 4 b, imm. 2-mik unioqqutitsinermut,  2) §§-it 1, 4 aamma 4 a malillugit paasissutissanik eqqunngitsunik amigartunilluunniit tunniussaqaarnermut, aamma  3) § 2 malillugu eqqunngitsunik nalunaaruteqarnermut.”</p>
	<p><b>12.</b> § 5-imi imm. 3-4-tut ilanngunneqassapput:  ” <i>Imm. 3.</i> Akiliisitsissutit imm. 1-2 malillugit aalajangersarneqartut nunatta karsianut nakkartassapput.  <i>Imm. 4.</i> § 4 b, imm. 2-mik unioqqutitsisoqartillugu Kalaallit Nunaanni pinerluttulerinermut inatsimmi malittarisassat malillugit arsaarinnittoqarsinnaavoq. Arsaarinnissutit nunatta karsianut iluaqutissanngortinneqassapput.”</p>
	<p style="text-align: center;"><b>§ 2</b></p> <p>Inatsisartut inatsisaat Inatsisartut inatsisaata tamanut nalunaarutigineqarnerata aqaguani atuutilissaaq.  <i>Imm. 2.</i> § 1, nr. 5, 6 aamma 8 kiisalu § 4a, § 1, nr. 10-kkut ilanngunneqartoq,</p>

	siullermik atuutilissapput tapiissutitut ukiumi naatsorsuuteqarfiusumi 2025-mi pissarsiarineqartunut.
--	---